



**Broj predmeta: KSI-12-95/21**

**Datum: 24.01.2022. godine**

Na temelju člana 25 točka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta BiH“ broj: 04/21) i člana 25 stav (2) Poslovnika o radu Komisije za odlučivanje o sukobu interesa („Službeni glasnik Brčko distrikta BiH“ broj:19/21), povodom Informacije savjesnih radnika o sukobu interesa za članstvo u Upravnom odboru JP „Komunalno Brčko“ d.o.o. Brčko distrikt BiH, protiv D.T., zaprimljenu dana 22.12.2021 godine, Komisija za odlučivanje o sukobu interesa na 13. sjednici, održanoj dana 24.01.2022 godine donosi

### **ODLUKU**

Postupak za odlučivanje o sukobu interesa protiv nosioca javne funkcije D.T., člana Upravnog odbora JP „Komunalno Brčko“ d.o.o. Brčko distrikt BiH, u vezi okolnosti da je u sukobu interesa neće se pokrenuti, s obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do moguće povrede odredbi Zakona o sprečavanju sukoba interesa u institucijama Brčko distrikta Bosne i Hercegovine.

### **Obrazloženje**

Komisija je 22.12.2021. godine pod brojem: KSI-12-95/21 zaprimila Informacije o sukobu interesa za članstvo u Upravnom odboru JP „Komunalno“ d.o.o. Brčko distrikt BiH, od Savjesnih radnika.

U predmetnoj Informaciji se navodi da je D.T., član Upravnog odbora JP „Komunalno Brčko“ d.o.o. Brčko distrikt BiH, imao suradnju u ranijem periodu s Vladom Brčko distrikta BiH i JP „Komunalno Brčko“ doo Brčko distrikt BiH, radeći kao odgovorno lice u „SPKD“ Prosvjeta Brčko i ekspozituri NLB Banke u Brčkom, te ukoliko bude imenovan za člana Upravnog odbora JP „Komunalno“ doo Brčko distrikt BiH, postojao bi sukob interesa.

Nadalje, navodi se da je D.T. sudjelovao u sklapanju ugovora o bankarskim garancijama i revolving kreditima između gore navedene banke i JP „Komunalno Brčko“ doo Brčko distrikt BiH, te da je SPKD „Prosvjeta“ dobijalo novčana sredstva iz budžeta Brčko distrikta u periodu kada je imenovani bio predsjednik SPKD „Prosvjeta“ Brčko.

Članom 2 tačka c) Zakona o sprječavanju sukoba interesa propisano je da je nosilac javne funkcije izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javne ovlasti i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano. Komisija je uvidom u Registar javnih funkcija, nosilaca javne funkcije, imovine nosilaca javne funkcije i darova, utvrdila da D.T. obnaša funkciju člana Upravnog odbora JP „Komunalno Brčko“ d.o.o. Brčko distrikt BiH, Odlukom o imenovanju Skupštine Brčko distrikta broj 01-02-7263/21 od 22.12.2021.godine. Slijedom navedenog, povodom obnašanja navedene funkcije, D.T. obvezan je postupati u skladu s odredbama Zakona o sprječavanju sukoba interesa.

Članom 13 stav (1) Zakona o sprječavanju sukoba interesa, propisano je da za vrijeme obnašanja javne funkcije nosilac javne funkcije ne smije obnašati dužnost lica ovlaštenog za

zastupanje ili člana organa upravljanja i nadzornog organa u fondaciji i udruženju osnovanoj sukladno zakonima o udruženjima i fondacijama, a koje se financiraju iz proračuna bilo koje razine vlasti, u iznosu većem od 10.000 KM godišnje.

Komisija je radi provjere navoda iz Informacije dopisom broj: KSI-12-95/21 od 27.12.2021. godine, zatražila od D.T. dostavu podataka o okolnostima iz Informacije.

D.T. odgovorio je na traženje Komisije dopisom od 04.01.2022. godine, navodeći da je dana 24.12.2021.godine podnio neopozivu ostavku na mjesto predsjednika SPKD „Prosvjeta“ Brčko, te do izbora novog predsjednika Društva, funkciju v.d. predsjednika obnaša dotadašnji potpredsjednik.

Komisija je u cilju provjere podataka uputila SPKD „Prosvjeta“ Brčko dopis broj: KSI-12-95/21 od 13.01.2022. zahtijevajući dostavu podatka da li je imenovani podnio neopozivu ostavku na mjesto predsjednika SPKD „Prosvjeta“ Brčko, dana 24.12.2021. godine.

SPKD „Prosvjeta“ Brčko je dana 18.01.2022. godine odgovorilo na zahtjev Komisije za odlučivanje o sukobu interesa, navodeći da je D.T. dana 24.12.2021. godine dao neopozivu ostavku na mjesto predsjednika SPKD „Prosvjeta“ Brčko, te da do izbora novog predsjednika kojeg će izabrati Skupština Društva, funkciju v.d. predsjednika obnaša dosadašnji potpredsjednik društva.

Kontaktirajući ovlaštenog službenika NLB Banke Brčko, Komisija za odlučivanje o sukobu interesa je informisana, da kredite klijentima odobrava Centrala Banke, Sektor zadužen za velika i javna poduzeća. Za revolving kredit, JP „Komunalno Brčko“ raspisan je javni poziv, te je kao najpovoljniji ponuđač izabrana NLB Banka, Filijala Brčko.

Na osnovu prikupljenih podataka i dokumentacije Komisija je utvrdila da D.T. nije obnašao dužnost lica ovlaštenog za zastupanje ili člana organa upravljanja i nadzornog organa u fondaciji i udruženju osnovanoj sukladno zakonima o udruženjima i fondacijama, a koje se financiraju iz budžeta bilo koje razine vlasti, u iznosu većem od 10.000 KM godišnje, za vrijeme obavljanja javne funkcije, odnosno za vrijeme obnašanja funkcije člana Upravnog odbora JP „Komunalno Brčko“ doo Brčko distrikt BiH, jer je dao ostavku u roku od tri dana od dana preuzimanja javne funkcije.

Slijedom navedenog, Komisija je donijela odluku kao u dispozitivu odluke.

## **POUKA O PRAVNOM LIJEKU:**

Protiv ove Odluke nije dozvoljena žalba, ali se može pokrenuti upravni spor Osnovnom sudu Brčko distrikta BiH u roku od 30 dana od dana prijema Odluke.

Predsjednik

Komisije za odlučivanje o sukobu interesa

Admira Mujić, dipl. pravnik

## **Dostaviti:**

1. D.T.
2. Evidenciji
3. Arhivi